



Na osnovu člana 17. stav (1) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sudija Velimir Ninković i Sanela Gorušanović - Butigan, potpredsjednici Vijeća, te sudija Izo Tankić, sutkinja Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, tužilac Saša Sarajlić, sutkinja Ljiljana Bošnjak - Glizijan, prof. dr. Džamna Vranić, advokatica mr Duška Bogojević, advokat dr. sc Davor Martinović, tužiteljica Željka Fabić i advokatica Elma Veledar Arifagić, na sjednici održanoj 26. i 27.02.2025. godine, donijelo je

R J E Š E N J E

o imenovanju predsjednika Osnovnog suda u Kozarskoj Dubici

- I. Za predsjednika Osnovnog suda u Kozarskoj Dubici imenuje se **Kalaba Dragan**.
- II. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena pozicija predsjednika Osnovnog suda u Kozarskoj Dubici.

Nakon provedene konkursne procedure, nadležno podvijeće je u skladu sa članom 61b. stav. (2) Poslovnika VSTV-a BiH za predsjednika navedenog suda, predložilo kandidata na rang listi pod rednim brojem 1 sa liste uspješnih kandidata, koji na sjednici Vijeća izlaže program rada koji je ranije dostavio i izložio komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće je dostavilo Vijeću obrazloženi prijedlog za navedenog kandidata, sa bodovima koje je kandidat ostvario u konkursnoj proceduri i njegovim programom rada, te rang listu kandidata.

Nakon izlaganja prijedloga podvijeća, kandidat je na sjednici Vijeća, u skladu sa članom 61b. stav (7) Poslovnika VSTV-a BiH izložio svoj program rada.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je odlučilo da za predsjednika Osnovnog suda u Kozarskoj Dubici imenuje kandidata pod rednim brojem 1 na rang listi Kalaba Dragana, koji od 01.11.2016. godine obavlja dužnost predsjednika tog suda.

Vijeće je nakon ocjene stručnosti kandidata, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kada je u pitanju broj ostvarenih bodova, Vijeće je uzelo u obzir činjenicu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 96 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 28 bodova od mogućih 30 bodova, što ga je u konačnici rangiralo na prvom mjestu rang liste kandidata sa ukupno ostvarenih 124 bodova od mogućih 130 bodova.

Kriteriji stručnosti i sposobnosti pravne analize imenovanog kandidata, koji je nosilac pravosudne funkcije utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 5 i 5, utvrđeno je da je kandidat za navedene tri godine za koje je ocijenjen ostvario prosjek od 4,7. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u konkursnoj proceduri od 96 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti i rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54b., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 28 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (2) tačka a) Poslovnika VSTV-a BiH stekao uvjete za predlaganje i imenovanje na poziciju predsjednika osnovnog suda, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Imenovanje navedenog kandidata, pored uspjeha postignutog u konkursnoj proceduri i izlaganja programa rada, opredjelila je i činjenica da je isti, obavljajući u prethodna dva mandata dužnost predsjednika Osnovnog suda u Kozarskoj Dubici, pokazao visok stepen vještine rukovođenja i organizovanja rada, kao i sposobnost upravljanja ljudskim potencijalima. Prethodno imenovanju na poziciju predsjednika navedenog suda imenovani kandidat je u periodu od 2006. g. do 2016. g. obavljao dužnost dodatnog sudije i sudije Osnovnog suda u Banja Luci, a u periodu od 2000. g. do 2003. g. dužnost sudije Općinskog suda u Bugojnu. U periodu od 1988. g. do 1992. g. obavljao je dužnost zamjenika glavnog tužioca Općinskog tužilaštva u Bugojnu, a u periodu od 1982. g. do 1988. g. dužnost sudije Općinskog suda u Bugojnu.

Kroz izlaganje programa rada za mandatni period koji je kandidat dostavio u toku konkursne procedure i izložio tokom obavljenog razgovora pred nadležnom komisijom Vijeća, kao i na sjednici Vijeća, kandidat je detaljno obrazložio strateške ciljeve, te ciljane rezultate i predložene mjere, kojima kroz pravovremeno donošenje određenih odluka i nadzorom nad radom sudija i ostalih zaposlenika, namjerava unaprijediti i

osigurati zakonito i efikasno rukovođenje sudom. Cijeneći sve navedeno, Vijeće smatra da će imenovani kandidat uspješno, stručno i savjesno odgovoriti obavezama i dužnostima koje nosi navedena rukovodna funkcija.

Uzimajući u obzir navedeno, Vijeće je ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju predsjednika Osnovnog suda u Kozarskoj Dubici.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju imenovanog kandidata, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. g. do 28. februara 2025. g. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1036-1/2025
Datum: 27.02.2025. godine



